

Benteng penahan ombak tidak diselenggara punca air naik

SABAK BERNAM

Penduduk mendakwa benteng penahan ombak yang gagal diselenggarakan dengan baik antara punca beberapa kawasan dinaiki air susulan fenomena air pasang besar.

Penduduk di Kampung Projek Perumahan Rakyat Termiskin (PPRT) Sungai Tengar Utara, Mohd Nor Isa Othman, 55, berkata, benteng penahan ombak di kampungnya itu rosak sejak empat tahun lalu.

"Jabatan Pengaliran dan Saliran (JPS) ada baiki ban (benteng) ni, tapi ia rosak semula beberapa bulan kemudian. Saya harap JPS akan gunakan bahan yang lebih kukuh untuk bina ban di sini," katanya.

Sementara, Nor Asmah Ahmad Keliwon, 47, berkata, air pasang besar yang melanda pada tahun ini merupakan yang terburuk.



Kerja-kerja baikpulih giat dilaksanakan JPS sebagai langkah menangani ancaman air pasang besar.

Nor Asmah berkata, pada kebiasaannya, fenomena air pasang tidak menyebabkan banjir teruk di kawasan rumahnya, tapi tahun ini, sehingga dua kali dia perlu berpindah di pusat pemindahan.

"Air pasang pada bulan lepas dan sekarang paling teruk, habis halaman rumah naik air," katanya.

Katanya, benteng di kampungnya telah dibaiki, tapi masih tidak mampu halang air

laut daripada masuk.

Sementara itu, *Sinar Harian* difahamkan, JPS giat melaksanakan kerja baik pulih benteng dan pemantauan berterusan bagi menangani ancaman fenomena air pasang.

Jawatankuasa Pengurusan Bencana Selangor melaporkan fenomena air pasang luar biasa bermula Ahad lalu, dijangka berakhir Khamis ini.